

四庫全書

子部

欽定四庫全書

冊府元龜卷七百八十二 宋 王欽若等撰

總錄部

榮遇

易曰崇高莫大於富貴詩曰為龍為光蓋士之趨世者
或道合時主或功濟大業然後享豐祿齒高位澤及於
宗黨寵被於閭壺度越羣品垂為美談者斯有之矣若
乃出於困辱奮自卑冗終以貴盛申其志節以至期運

亨會執望熏灼明詔敦獎徽美舉集或繁服歸於故郡
或榮養及於庭闈或展墓以達永懷或即家而為公府
至乃父子更任於劇職宗戚迭處於要任以壯齒而躋
顯仕因請老而還舊貫中外更踐便蕃增秩時君異其
恩禮舉將更其出處斯皆才命胥契福祿來同致光景
之振耀聳人倫之欽慕非夫保若驚之訓得持盈之道
又曷能克終而寡悔哉

蘇秦雒陽人出游數歲大困而歸兄弟嫂妹妻妾皆笑

之及為從約長并相六國北報趙王及行過雒陽車騎

輜重諸侯各發使送之甚衆擬於王者周顯王聞之恐

懼除道使人郊勞

賓至近郊君使卿朝服用束帛勞

蘇秦之昆弟妻嫂

側目不敢仰視俯伏侍取食蘇秦笑謂其嫂曰何前倨

而後恭也嫂委蛇蒲服以面掩地而謝曰見季子位高

而金多也

蘇秦字季子

蘇秦喟然嘆曰此一人之身富貴則

親戚畏懼之貧賤則輕易之況衆人乎且使我有雒陽

負郭田二頃吾豈能佩六國相印乎於是散千金以賜

宗族朋友

漢嚴助會稽吳人為中大夫助侍燕從容武帝問助居鄉里時助對曰家貧為友壻富人所辱

友壻同門之壻

帝問所欲對願為會稽太守於是拜為會稽太守

朱買臣字翁子會稽吳人家貧妻求去買臣不能留即聽去後買臣為會稽太守武帝謂買臣曰富貴不歸故鄉如衣繡夜行今子何如買臣頓首辭謝初買臣免侍詔嘗從會稽守邸者寄居飯食拜為太守買臣衣故衣

懷其印綬步歸郡邸直上計時會稽吏方相與羣飲不
視買臣買臣入室中守邸與共食食且飽少見其綬守
邸怪之前引其綬視其印會稽太守章也守邸驚出語
上計掾吏皆醉大呼曰妄誕耳守邸曰試來視之其故
人素輕買臣者入內視之還走疾呼曰實然坐中驚駭

白守丞

漢舊郡國丞相長史與計吏俱逆計也謂之守丞者繫太守而言也

相推排陳列

中庭謁拜買臣徐出戶有頃長安廐吏乘駟馬車來迎

故事大夫乘官車駕駟如今州牧刺史矣買臣遂乘傳去會稽聞太守且至

發民除縣長吏並送迎車百餘乘入吳界見其故妻妻夫治道買臣馳車呼令後車載其夫妻到太守舍置園中給食之居一月妻自經死買臣乞其夫錢令葬悉召見故人與飲食諸嘗有恩者皆報復焉

司馬相如字長卿蜀郡成都人武帝時以中郎將至蜀太守以下郊迎縣令負弩先驅蜀人以為寵

薛廣德沛郡相人為御史大夫乞骸骨賜安車駟馬黃金六十斤罷廣德東歸沛太守迎之界上沛以為榮懸

其安車傳子孫

疏廣為太子太傅廣兄子受為太子少傅太子每朝因進見太傅在前少傅在後父子並為師傅朝廷以為榮班伯高祖壹始皇之末避地於樓煩漢孝惠時以財雄邊伯後為定襄太守歲餘成帝徵伯伯上書願過郡上父祖冢有詔太守都尉以下會其所因召宗族各以親疎加恩施散數百金北州以為榮長老紀焉

後漢馮異潁川交城人為孟津將軍光武建武二年征

陽翟賊嚴終趙根破之詔異歸上冢使大中大夫齋牛酒令二百里內太守都尉以下及宗族會焉

景丹馮翊櫟陽人為驃騎大將軍建武二年定封丹櫟陽侯光武謂丹曰今關東故王國雖數縣不過櫟陽萬戶邑夫富貴不歸故鄉如衣繡夜行故以封卿耳

岑彭南陽棘陽人建武六年為征南大將屯津鄉南還
有詔過家上冢大長秋以朔望問太夫人起居

王恒潁川舞陽人為漢中將軍平沛郡賊建武六年徵

恒還雒陽令人夫迎恒於舞陽歸家上冢

吳漢南陽人建武十二年為大司馬平蜀振旅浮江而下至宛詔令過家上冢賜穀二萬斛

傅變北地靈州人太守范津舉變孝廉及津為漢陽與變交代合符而去鄉邦榮之

韓稜潁川華陽人為南陽太守特聽稜得過家上冢鄉里以為榮

韋端自涼州牧徵為太僕其子康代為涼州刺史時人

榮之

魏張既馮翊高陵人漢末自尚書出為雍州刺史太祖謂既曰還君本州可為衣繡畫行矣

張遼為前將軍屯合肥進遼爵都鄉侯給遼母輿車及兵馬送遼家詣屯勅遼母至尊從出迎所督諸軍將吏皆羅拜道側觀者榮之

吳朱治丹陽故鄣人大帝黃武二年拜安國將軍領吳郡是時丹陽深地頻有姦叛亦以年向老思戀土風自

表也故鄣鎮撫山越諸父老故人莫不詣門治皆引進
與共飲宴鄉黨以為榮在故鄣歲餘還吳

全琮吳郡錢塘人黃武七年為東安太守還經過錢塘
修祭墳墓麾幢節蓋曜於舊里請會邑人平生知舊宗
族六親施散惠與千有餘萬本土以為榮

諸葛恪為撫越將軍領丹陽太守授檄戟武騎三百拜
畢太帝命恪備威儀作鼓吹導引歸家時年三十三
紀陟景帝時父亮為尚書令陟為中書令每朝會詔以

屏風隔其座焉

晉鄭球字瑜少辟宰府七侍二宮

袁瓌與弟猷俱渡江瓌為丹陽猷為武康兄弟列宰名
邑論者美之

陶侃家于潯陽後為江夏太守加鷹揚將軍侃備威儀
迎母官舍鄉里榮之

荀羨除北中郎將徐州刺史監徐兗二州揚州及晉陵
諸軍事時年二十八中興方伯未有如羨之少者

韋謏前後四登九列六在尚書三為侍中再為太子太傅封京兆公陳軍國之宜多見允納

宋鄭鮮之為高祖太尉諮議高祖北伐以為右長史鮮之曾祖墓在開封相去三百里乞求拜省高祖以騎送之

南齊王奐仕宋領驍騎將軍又遷征虜將軍臨川王鎮西長史領南蠻校尉南郡內史一歲三遷

張岱吳郡人高帝建元元年出為左將軍吳郡太守太

祖知岱歷任清直至郡未幾手勅岱曰大邦任重乃未
欲廻換俱總戎務殷宜須望實今用卿為護軍加給事
中岱拜竟詔以家為府

孫瑒吳郡人自湘州刺史徵為散騎常侍中領軍未拜
而武帝從容謂瑒曰昔朱買臣願為大郡卿豈有意乎
乃改授持節安東將軍吳郡太守給鼓吹一部及將之
鎮乘輿幸近畿餞送鄉里榮之

梁范雲為散騎常侍吏部尚書常侍譙高祖謂臨川王

宏都陽王恢曰我與尚書少親善申四海之敬今為天下主此禮即革汝宜代我呼范為兄二王下席拜與雲同車還尚書下省時人榮之

呂僧珍東平苑人為左衛將軍領太子中庶子僧珍去家久表求拜墓高祖欲榮之使為本州乃授使持節平北將軍南兗州刺史

柳慶遠河東解人為使持節都督雍梁南北秦四州諸軍事征虜將軍寧蠻校尉雍州刺史高祖餞於新亭謂

曰卿衣錦還鄉朕無西顧之憂矣

到洽以天監二年為司徒主簿直待詔省勅使抄甲部書遷尚書殿中郎洽兄弟羣從遞居此職時人榮之

王僧孺幼貧其母鬻紗布以自業常攜僧孺至市道遇中丞鹵簿驅迫溝中及僧孺為丞引騶清道悲感不自勝

朱异為中書通事舍人遷散騎常侍累遷中領軍异居權要三十餘年歷官自員外常侍至侍中四職並驅鹵

薄近代未之有也

張綰為御史中丞舊制元日僕射中丞坐位東西相當大同四年綰兄纘為僕射及有司就列兄弟導騶兩塗前世未有也時人榮之

孔休源初為中書舍人司徒臨川王記室參軍後臨川王為揚州刺史薨高祖與羣臣議王代居州任者久之時貴戚王咸望遷授高祖曰朕已得人孔休源實應此選乃授宣惠將軍監揚州休源初為臨川王行佐及王

薨而管州任時論榮之

劉之遴南郡涅陽人自太學博士出為南郡太守高祖謂曰卿母年德並高故令卿衣錦還鄉盡榮養之理

陳侯安都始興人為司空征北將軍南徐州刺史父文得為始興內史卒於官文帝徵安都還京師為發喪尋起復本官贈其父散騎常侍金紫光祿大夫拜母為清遠國太夫人仍迎還都母固求停鄉里帝乃下詔改陸陽郡之汝城縣為廬陽郡分衡州之始興安遠二郡合

三郡為東衡州以安都從弟曉為刺史安都第三子祕年九歲帝以為始興內史並令在鄉侍養

王瑜字子珪早歷清顯三十官至侍中

袁憲為右僕射參掌選事先是憲長兄樞為左僕射至是臺省目樞為太僕射憲為小僕射朝廷榮之

後魏崔浩白馬公元伯之長子浩為祭酒每至郊祠父子並乘軒輅時人榮之

畢眾敬為兗州刺史其子元賓亦為兗州刺史父子相

代為州當世榮之

甄琛中山毋極人為征北將軍定州刺史衣錦晝遊大
為稱滿

李憲為散騎侍郎以母老乞歸養憲趙郡平棘人也因
拜趙郡太守

李元護遼東襄平人為齊州刺史經拜舊墓廵省故宅
享賜村老莫不欣暢

崔鴻為尚書都兵郎中宣武詔太師彭城王勰以下公

卿朝士儒學才明者三十人議定律令於尚書上省鴻
與父光俱在其中時論榮之

孫惠蔚歷國子祭酒祕書監出為平來將軍濟州刺史
還京除光祿大夫魏初以來儒生寒官惠蔚最為顯達
董徵頓邱衛國人為輔國將軍除安州刺史徵因述職
路次過家置酒高會大享邑老乃言曰腰龜返國昔人
稱榮仗節還家云胡不樂因誡二三子弟曰此之富貴
匪自天降乃勤學所致耳時人榮之

茹皓舊吳人與趙脩俱侍直禁中為脩所妬出為濮陽太守其父讓之因皓訟理舊勲先除兗州陽平太守賜以子爵父子剖符名邦郡境相接

趙邕南陽人為殿中將軍初邕父怡歷郢州刺史停家久之以邕寵召拜太常少卿尋為荊州大中正出除征虜將軍荊州刺史邕弟尚中書舍人出除南陽太守怡辭荊州也尚求解郡與父俱還未至京師逆除步兵校尉

陸彰字明遠以衛將除齊州刺史又加驃騎將軍行懷
州事轉北豫州刺史仍除徐州刺史將軍並如故一年
歷三州當世榮之

房士達清河人為京北王騎兵參軍其鄉人劉均房須
等作亂攻陷郡縣士達父憂在家刺史元欣以士達為
將士達率州人悉破平之就家拜平原太守孝莊帝時
轉濟南太守士達不入京師而頻為本州郡時人榮之
楊逸字遵道為西平將軍南秦州刺史年二十九歲時

方伯之少未有先之者

北齊魏收字伯起初仕後魏節閔時為散騎侍郎尋勅
典起居注并修國史俄兼中書侍郎時年二十六

邢邵字子才仕東魏為太常卿中書監攝國子祭酒是
時朝臣多守一職帶領二官甚少邵頓居三職並是文
學之首當世榮之

崔瞻為文宣相府司馬使于東魏孝靜帝其父悛侍宴
又勅瞻令近御座亦有應詔詩詔問邢邵等曰此詩何

如其父咸云懷博雅宏麗瞻詞氣清新並詩人之冠
詔罷其嗟賞之咸云今日之譙併為崔瞻父子

後周楊標正平高涼人魏孝武入關時為建武刺史鎮
車箱標久從軍役以未及葬父至是表請遷葬詔贈其
父車騎大將軍儀同三司晉州刺史贈其母夏陽縣君
並給儀衛州里榮之

蘇亮武功人仕西魏為岐州刺史朝廷以其牧本州特
給路車鼓吹先還其宅并給騎士三十列羽儀遊鄉黨

經過故人歡會旬日然後入州世以為榮亮自文帝大統以來無歲不轉官一年或至三遷僉曰才至不怪其速也

赫連達雲中盛樂人仕西魏為帥都督封魏昌伯太祖以達勲望兼隆乃除雲州刺史進爵為公拜大都督田宏字廣略平原人西魏大統中自帥都督授原州刺史時以宏勲望兼至故以衣錦榮之

段永仕西魏為常州刺史于時朝貴多其部人謁永之

日冠蓋盈路當時榮之

鄭雛初仕北齊為尚書郎趙郡李祖昇兄弟不甚敬憚及楊愔奏授雛趙郡太守祖昇兄弟具服至雛門投刺拜謁文宣聞之喜笑曰足得殺李家兒矣

李穆除原州刺史又以兄賢子為平高郡守遠子為平高縣令並加鼓吹穆自以叔姪一家三人皆牧宰鄉里恩遇過隆固辭不拜太祖不許

王傑金城直城人仕西魏為驃騎大將軍孝閔踐祚進

爵張掖郡公增邑一千戶出為河州刺史朝廷以傑勲望俱重授本州

馮遷閔帝時為晉公護府掾後以其朝之舊齒欲以錦衣榮之乃授陝州刺史進爵隆山郡公增邑通前二千戶遷本寒微不為時輩所重一旦刺舉本州唯以謙恭接待鄉人無怨者

令狐整為中外府樂曹參軍時諸功臣多為本州刺史晉公護謂整曰以公勲望應得本州但朝廷藉公委任

無容遠出然公一門之內須有衣錦之榮乃以弟休為
燉煌郡守

劉雄臨洮子城人為內史大夫除候正高祖嘗從容謂
雄曰古人云富貴不歸故鄉猶衣錦夜遊今以卿為本
州何如雄稽首拜謝於是詔以雄為河州刺史雄先已
為本縣令復有此授鄉里榮之

柳敏河東解人年未弱冠起家員外散騎侍郎累遷河
東郡丞朝議以敏本邑故有此授

唐瑾為蔡州刺史歷柘州硤州轉荊州總管府長史入為吏部中大夫歷御正納言中大夫曾未十旬遂遷四職擢紳咸以為榮

辛威隴西人為鄜州刺史時望既重朝廷以桑梓榮之遷河州刺史本州大中正

薛慎為膳部下大夫慎兄善又任工部並居清顯時人榮之

王士良其先太原晉陽人後因避地涼州初仕齊為豫

州刺史後歸周為鄜州刺史轉金州刺史士良去鄉既久忽臨本州舊若故人猶有存者遠近咸以為榮

李遷哲安康人世為山南豪族後為車騎將軍從開封府賀若敦徇地巴濮以功除直州刺史即本州也仍給軍儀鼓節

柳檜為撫軍將軍大都督時檜兄虬為秘書丞弟慶為尚書左丞檜嘗謂兄弟曰兄兄則職典簡牘褒貶人倫弟則管轄郡司股肱朝廷可謂榮寵矣然而四方未靜車

書不一檜唯當蒙夫石履危難以報國恩耳

隋劉宏彭城人初仕北齊西楚州刺史及齊亡周武帝以為本郡太守

田式字顯標馮翊下邳人祖安與父長樂仕魏俱為本郡太守式仕周又為本郡太守

蘇威煬帝時為納言與左翊衛大將軍宇文述黃門侍郎裴矩御史大夫裴蘊內史侍郎虞世基參掌朝政時人稱為五貴從征遼東還至涿郡詔威安撫關中以威

孫尚輦直長僊為副其子鴻臚少卿夔先為關中簡點
大使一家三人俱奉使關右三輔榮之

樊子蓋廬江人為武威太守朝於江都宮煬帝謂之曰
富貴不還故鄉真衣繡夜行耳勅廬江郡設三千人會
賜米麥六十石使謁墳墓宴故老當時榮之

來護兒江都人為右翊衛大將軍煬帝幸江都謂護兒
曰衣錦晝遊古人所重卿今是也乃賜物三千段并牛
酒令謁先人墓宴鄉父老仍令三品已上並集其宅酣

飲一日朝野榮之

唐張鎮州同安人武德中為舒州都督舒州即本邑也鎮州乃多市酒肴就望江舊宅盡召故人親戚與之酣宴散髮箕踞敦疇昔之歡十日贈以金帛既而垂泣謂親賓曰此者張鎮州與故人為歡今日已後舒州都督治百姓耳君民禮隔不得交遊因與之訣

姜謩秦州上邽人武德初平薛仁果拜秦州刺史高祖謂曰衣錦還鄉古人所尚今以本州相授用荅元功涼

州之路近為荒梗宜宏方略有以靜之暮至州撫以恩
信州人相謂曰吾輩復見太平官府矣盜賊悉來歸首
士庶安之

張士貴宏農盧氏人武德中以戰功授虢州刺史高祖
謂曰欲卿衣錦晝遊耳

溫大雅武德元年為黃門侍郎弟彥將為中書侍郎列
居近侍議者榮之高祖從容謂曰我起義晉陽為卿一
門耳

張行成定州義豐人為刑部侍郎太子詹事遼東之役從太子於定州監國即行成本邑也太子謂行成曰今者送公衣錦還鄉於是令有司祀其先人墓

薛收與從父兄子元敬俱為文學館學士

賈敦實為饒陽令時制大功已上不得聯職敦實兄敦疇復為瀛州刺史朝廷以其兄弟庶謹特許令同州竟不遷替時人榮之

劉祿之為左史宏文館直學士時又密令參決以分宰

相之權時人謂之北門學士禕之兄懿之時為給事中兄弟並居兩省論者美之

韋承慶弟嗣立則天長壽中始代承慶為鳳閣舍人長安三年承慶又代嗣立為天官侍郎頃之又代嗣立知政事時以為榮

蘇頲中宗神龍中累遷給事中加修文館學士轉中書舍人時頲父瓌同中書門下三品父子同掌樞密時以為榮

賀知章為祕書監請度為道士求還鄉里天寶三載正月庚子遣左右相已下祖別於長樂坡帝賦詩以贈

李峴信安王禕之第三子肅宗至德中為京兆尹兼御史大夫時峴兄峴為戶部尚書兼成都尹乾元初玄宗還京峴自蜀至又兼御史大夫兄弟俱判臺事自國初以來兄弟並拜大夫未有其比時長安士庶皆賦詩美之

于休烈嗣子益次子肅相繼為翰林學士

歸宗敬德宗興元初為散騎常侍宣慰兩河及還上表請歸拜墓許之賜以繒帛儒者榮之

楊懷賓與其子朝晟並為邠寧節度韓遊瓌裨將父子同軍皆為開府賓客御史中丞異姓王榮於軍中

陸贄為翰林學士時贄母韋氏在江東德宗遣中使迎至京師措紳榮之

吳通微自壽安縣令人為金部郎中充翰林學士尋改職方郎中知制誥與弟通元同職禁署人士榮之

趙宗儒為右拾遺翰林學士父驛為祕書少監與父並命出於中旨當時榮之

田宏正自魏博節度移統鎮冀其子希文為河陽三城懷州節度父子同日拜命皆領節制

崔邈為吏部侍郎兄弟同時奉朝請者四人後改太常卿故事大卿初上大閱四部樂於官署觀者縱馬邈自私第去帽親導母舉公卿逢者為迴騎避之衢路以為榮

王鐸為容管經嶺南淮南河中太原四任節度受符節
居方面凡二十餘年仍加同平章事

柳公綽為吏部侍郎與舅左丞崔從同省人士榮之

孫德昭與孫承誨董從實以反正功德昭為檢校太保
靜海軍節度使承誨邕州節度使從實容州節度使並
同平章事時人呼為三使相思澤俱冠世

後唐張全義為忠武軍節度使全義於本朝迨朱氏之
世自尚書僕射司空司徒平章事侍中守太師太傅太

保太尉中書令尚書令封王食邑至一萬三千戶自雒
鄆陝滑宋三蒞河陽再領許州相繼十換麾幢歷二十
九任位冠人臣善保終吉者一人而已

李琪與兄班俱登進士第為梁太祖所知及革命以班
為崇政學士琪為翰林學士昆仲並處禁林

康思立本出陰山諸部性純厚善撫御明宗素重之故
即位之始以應州所生之地授焉

封舜卿為中書舍人從子渭為翰林學士叔姪對掌內


外制又從子翹仕梁亦為翰林學士

晉劉昫初仕後唐為兵部侍郎端明殿學士長興四年
行中書侍郎兼刑部尚書平章事入謝日遇大祠明宗
不御中興殿昫至中興殿門閤門使曰舊禮宰臣謝恩
須於正殿通喚今日上以大祠不坐正殿請候來日樞
密使趙延壽曰命相之制下已三日中謝無宜後時即
奏聞昫遂中謝於端明殿廷昫自端明學士拜相而謝
於本殿人士榮之

孔崇弼初仕後唐自吏部郎中授給事中時族兄昭序由給事中改左常侍兄弟同居門下時論榮之

王建立為昭義軍節度使進封韓王仍割遼沁二州為昭義屬郡以建立本遼州人用成其衣錦之美也

漢龍敏幽州永清人也初仕後唐為御史中丞敏父咸式年七十咸式之父年九十餘敏供養二尊朝夕無懈咸式以敏貴得祕書監致仕敏為兵部侍郎奉使幽州鄉里耆舊留宴盡歡



冊府元龜卷七百八十二

欽定四庫全書

子部

冊府元龜卷七百八十三

六

詳校官中書_臣吳瓌

侍讀_臣孫球覆勘

總校官庶吉士_臣何思鈞

校對官助教_臣胡予襄

謄錄監生_臣吳紹昆

監生_臣任兆炯

欽定四庫全書

冊府元龜卷七百八十三

宋王欽若等撰

總錄部

世德
兄弟齊名

世德

詩曰維其有之是以似之傳曰世濟其美不隕其名斯
皆錫美餘慶象賢秉哲奕世載德克篤前烈之謂也中
代已降宗胄派別家聲系譜參諸簡冊乃有學古從政

繼志隆業貞固以幹事端謹而植操篤守忠孝敦尚儒雅方正無撓謙恭不競奉身以約處衆以廉行能傑出知用周達義風英烈耀映前後以至爵秩通貴名望充塞無忝爾祖能世其家業素彌邵淑聲載路為論者之歎服增士倫之景行信可以懲激凶族而敦厲衰緒者矣

隰叔子遼周難於晉國生子輿為大理

士為也

以正於朝

朝無姦官為司空以正於國國無敗績世及武子佐文

襄於諸侯諸侯無二心

士為生成伯
執軼生士會

漢石奮孝文時官至大夫恭謹學無與比長子建次乙
次慶皆以馴行孝謹至二千石

金日磾武帝時為侍中著忠孝節日磾子安上少亦為
侍中惇篤有智安上子敞元帝時為中郎將侍中帝晏
駕故事近貴隨陵為園郎敞以世名忠孝太后詔留侍
成帝為奉車水衡都尉敞為人正直敞子涉明經節儉
諸儒稱之官至長信少府

王崇為大司空御史大夫駿之子昌邑中尉吉之孫也
自古至崇世名清廉然材器名稱稍不能及父而祿位

彌隆

翟方進經學明習內行脩飾成帝時為丞相子宣亦明
經篤行君子人也及方進在為關都尉南郡太守

言方進未

死之時宣已為此官

方進少子義所居著名有父風烈

後漢廉范曾祖父褒成哀間為右將軍祖父丹王莽時
為大司馬庸部牧皆有名前世

陸康字季寧吳郡吳人父褒有志操連徵不至康少仕郡以義烈稱

桓榮子郁郁孫鸞曾孫彬郁中子焉孫典鸞孫曄郁孫麟並有名行自榮至典父子兄弟代作帝師

爰延清苦好學能通經教質慙少言桓帝時位大鴻臚子驥白馬令亦稱善士

郭賀字喬卿雒陽人祖父堅伯父游君並脩清節不仕

王莽

周舉子勰曾祖父楊至勰孫恂六世一身皆知名舉官終光祿大夫

仇覽五子皆有文史才少子元最知名覽嘗為考城主簿

陳球歷世著名為永樂少府球子瑀吳郡太守瑀弟琮汝陰太守弟子珪沛相珪子登廣陵太守並知名

謝承後漢

書陳瑀舉孝廉辟公府維陽市長後辟太尉府未到永漢元年就拜議郎遷吳郡太守不之官球兄子珪字漢瑜舉孝廉劇令去官舉茂才濟北相珪子登字元龍學通今古處身循理非法不行性兼文武有雄姿異畧領

廣陵太守魏志曰珪在廣陵有威名有功加伏波將軍年四十卒

楊震少子奉奉子敷篤志博聞議者以為能世其家震

中子秉秉子賜賜子彪自震至彪四世太尉德業相繼

與袁氏俱為東京名族

華嶠書曰東京楊氏袁氏累世宰相為漢名族然袁氏車馬衣

服極為奢僭能守家風為世所貴不及楊氏也

伏湛瑯琊東武人九世祖勝所謂濟南伏生者也湛光

武時為大司徒封陽侯卒二子隆翕嗣爵卒子光嗣光

卒子晨嗣晨卒子無忌嗣無忌卒子質嗣質卒子完嗣

自伏生以後世傳經學清靜無競故東州號為伏不闕
徐穉字孺子豫章南昌人恭儉義讓所居服其德屢辟
公府不起卒子喬篤行孝弟亦隱居不仕

陳禪巴郡安漢人仕郡功曹舉善黜惡為邦內所畏至
順帝時為司隸校尉子澄有清名官至漢中太守曾孫
寶亦剛壯有禪風為州別駕從事顯名州里

李固漢中南鄭人父邵為司徒邵通五經外質朴人莫
識固究覽墳籍結交英賢四方有志之士多慕其風而

來學京師咸歎曰是復為李公矣言繼其父為公冲帝
即位以固為太尉與梁冀參錄尚書事及帝晏駕固以
清河王蒜年長有德欲立之冀不從乃立樂安王子續
年八歲號為質帝固子變為安平歲相先是安平王續
在國無政為妖賊角所畧國家贖王得還朝廷議復其
國變上奏曰續在國無政為妖賊所虜守藩不稱損辱
聖朝不宜復國時議者不同而續竟歸藩變以謗毀宗
室輸作左較未滿歲王果坐不道被誅乃以變為議郎

京師語曰父不肯立帝子不肯立王

吳祐長子鳳官至樂浪太守少子愷新息令鳳子馮鯛

陽侯伯

鯛陽縣屬汝南郡

皆有名於世

陳留耆舊傳曰鳳字君雅馮字子高

陳寔為太丘長子紀為大鴻臚紀子羣魏司空羣子泰

為左僕射四世於漢魏二朝並有重名而其德漸漸小

減時人為之語曰公慙卿卿慙長紀弟諶字季方與紀

齊德同行父子並著高名時號三君每宰府辟召嘗同

時旌命羔雁成羣當世者靡不榮之諶早終

先賢行狀曰豫州百

城圖畫實紀
謹形像焉

荀叔字季和潁川潁陰人少有高行博學而不好章句
鄉里知名有子八人號曰八龍緄生衍衍子紹位至太
僕紹子融字伯雅與王弼鍾會俱知名為雒陽令參大
將軍軍事與弼會論易著義傳於世

荀氏家傳曰釋字長倩侯字叔靖詵

字曼倩侯子寓字景伯世語曰寓少與裴楷王戎杜默俱有名京邑仕晉位至尚書名甚顯著子嗣位至尚書

魏鮑勛漢司隸校尉宣之九世孫勛父信靈帝時為騎
都尉信父丹官至少府侍中世以儒雅顯

袁渙陳郡扶樂人漢司徒滂之子滂素寡慾終不言人之短渙清淨舉動必以禮太祖時為郎中令行御史大

夫事渙子侃亦清粹閑素有父風歷位郡守尚書

袁氏世紀

曰渙有四子侃寓奧準侃字公然論議清當柔而不犯善與人交在廢興之間人之所趣務者嘗謙退不為也時人以是稱之歷位黃門選部郎考為清平稍遷至尚書早卒寓字宣厚精辯有機理好道家之言少被病求官而卒與字公榮行足以屬俗言約而理當終於光祿勳準字孝尼忠信公正不恥下問唯恐人之不勝已以世事多險政常恬退而不敢求進著書十餘萬言論治世之務為易周官詩傳於世此準之自序也荀綽九州記稱準有萬才泰始中為給事中

袁氏子孫世有名位貴達至今

劉馥沛國相人漢末為揚州刺史子靖文帝黃初中為鎮北將軍靖子熙嗣建成鄉侯熙弟宏晉武帝為車騎大將軍自馥至宏世不曠名而有政事才

劉邠本名炎犯晉太子諱改邠位至太子僕子粹字純嘏至侍中次宏字終嘏至太常次漢字仲嘏至光祿大夫漢清沖有貴識名亞樂廣宏子咸徐州刺史次耽晉陵內史耽子愔字真長尹丹陽中興名士也

管寧北海朱虛人齊相管仲之後其先田氏有齊而管

氏去之或適魯或適楚漢興而管少卿為燕令始家朱
虛世有名節九世而生寧正始中特具安車蒲輪束帛
加璧聘焉會寧卒

鄭渾字文公河南開封人高祖父衆為漢太師衆父興
為諫議皆為名儒渾官至侍御史加駙馬都尉為陽平
沛郡二太守

蜀張翼捷為武陽人高祖父司空浩曾祖父廣陵太守
綱皆有名迹翼位至左車騎將軍領冀州刺史

譙周巴西西充國人也貌體專朴樵誠不飾潛識內敏
晉泰始中拜騎都尉少子同亦以忠篤質素為行舉孝
廉

謝炤幼以仁孝為行明達有才令弟貞履蹈法度篤學
尚義舉孝廉

吳虞翻會稽餘姚人官至騎都尉子汎最知名為散騎
常侍汎弟忠貞固幹事為宜都太守忠子潭字思與清
身有簡操外如退弱內堅正有膽幹仕晉歷位內外終

於衛將軍

賀齊為將子達及景皆有令名為佳將

陸遜吳郡吳人為上大將軍祖紆字叔盤敏淑有思學
守城門校尉父駿字季才淳懿信厚為邦族所懷官至
九江都尉

晉華表平原高唐人父歆清德高行為魏太尉表以苦
節垂名官至太常卿子廙宏敏有才義廙位光祿大夫
開府儀同三司弟嶠才學深博少有令問為內臺中書

散騎著作廩子混清真簡正位至侍中尚書

羊祜字叔子泰山南城人世吏二千石至祜九世並以清德聞祖續仕漢南陽太守父衛上黨太守祜位征南大將軍胡威父質以忠清著稱仕魏至荊州刺史威早厲志尚質之為荊州也威自京定省十餘日告歸父賜絹一疋為裝威曰大人清高不審於何得此質曰是吾俸祿之餘威受之其父子清慎如此

盧欽范陽涿人位尚書僕射祖植性剛毅有大節為漢

侍中父毓魏司空少居名位不顧財利清虛淡泊動循
禮典欽清澹有遠識

范粲字承明陳留外黃人漢萊蕪長丹之孫也高亮貞
正有丹風

束皙字廣微祖隴西太守父龕馮翊太守並有譽名
韓壽魏司徒暨之孫侍御史洪之子自暨以下世治素
業壽能敦尚家風

龔元之武陵漢壽人也好學潛默州舉秀才公府辟不

就武帝詔徵散騎常侍領國子祭酒不行弟子元壽亦有德操高尚不仕舉秀才及州辟召並稱疾不就帝以太學博士散騎侍郎給事中累徵遂不起

許竒字子泰弟猛子豹魏尚書允之子也並有治理才學竒為司隸校尉猛為幽州刺史竒子遐字思祖以清尚稱位至侍中猛子式字儀祖有才幹至濮陽內史平原太守

裴秀河東聞喜人時稱後進領袖位僕射秀子顧雅有

遠識為僕射顧子嵩有父祖風

庾峻潁州鄆陵人也祖乘才學洽聞漢司徒辟有道徵
皆不就伯父疑中正簡素仕魏為太僕父道廉退貞固
養志不仕牛馬有蹊齧者恐傷人不貨於市及諸子貴
賜拜大中大夫峻少好學有才思嘗游京師魏散騎常
侍蕪林老疾在家往候之林嘗就乘學見峻流涕良久
曰尊祖高才而性退讓慈和汎愛清靜寡慾不營當世
惟脩德行而已鄆陵舊五六萬戶聞今裁有數百君二

父孩抱經亂獨至今日尊伯為當世令器君兄弟復俊
茂此尊祖積德之所由也位至常侍

潘尼位太常卿祖曰助漢東海相父滿平原內史並以
學行稱

郭荷字承休雒陽人六世祖整漢安順之世公府八辟
公車五徵皆不就自整及荷世以經學致位荷明究羣
籍特善史書不應州郡之命

楊佺期宏農華陰人漢太尉震之後曾祖準為太常自

震至準七世有名德

祖林少有才望值亂沒胡父亮少仕偽朝後歸國終於梁州刺史以貞幹知名

袁質陳郡陽夏人五世祖渙魏郎中令自渙至質並以道素繼業惟其父耽以雄豪著質又以孝行稱厯瑯琊內史東陽太守

劉邁琨之祖也有經國之才為相國叅軍散騎常侍琨父蕃清高冲儉位至光祿大夫

滿奮寵之孫也。寵仕魏為太尉奮官至尚書令司隸校尉。性清平有識簡體量通雅有寵風。

吳隱之為廣州刺史清操踰厲常食不過菜及乾魚而已。子延之復厲清操為鄱陽太守。延之弟及子為郡縣者常以廉慎為門法。雖才學不逮隱之而孝悌潔敬猶為不替。

王承字安期。父湛祖昶。自昶至承世有高名。論者以為祖不及孫。孫不如父。承為元帝鎮東府從事中郎而卒。

孔愉字敬康會稽山陰人其先世居梁國曾祖潛太子少傅漢末避地會稽因家焉祖竺吳豫章太守父恬湘東太守從兄侃大司農俱有名江左

瞿陽潯陽人也篤行純素仁讓廉潔康帝以散騎常侍徵不至莊公車徵不至莊子矯亦有高操屢辭辟命矯子法賜孝武帝以散騎郎徵亦不至世有隱行

戴逵累徵散騎常侍不就逵卒長子勃有父風安帝義熙初以散騎侍郎徵不起

范宣高潔不就徵嘗以講誦為業子輯厯守國子博士
大將軍從事中郎自免歸亦以講授為事義熙中連徵
不至

宋袁湛字士深陳郡陽夏人也祖耽厯陽太守父質瑯
琊內史並知名

南齊劉瓛沛國相人也晉丹陽尹惔六世孫惔少清遠
有標寄為政清整瓛舉秀才丹陽尹袁粲於後堂夜集
瓛在坐粲指庭中柳樹謂瓛曰人謂此是劉尹時樹每

想高風今復見卿清德可謂不衰矣

潘詞為高平太守有清節子亮為昌憲令亦著廉名

郭原平有孝行為鄉里所宗父世道亦以至行旌表門閭原平三子一弟並著門行長子伯林舉孝廉次子靈馥舉儒林祭酒皆不就

王秀之祖裕性貞正徐羨之傳亮當朝裕不與來往及致仕隱吳興與秀之父瓚之書曰吾欲使汝處不競之地瓚之歷官至五兵尚書未嘗一詣朝貴江湛謂何偃

曰王瓚之今便是朝隱及柳元景顏師伯令僕貴要瓚之竟不候之至秀之為尚書又不與令王儉款接三世不事權貴時人稱之

梁劉敞字士光祖乘民宋冀州刺史父懷慰齊正員郎世為二千石皆有清名

王志字次道瑯琊臨沂人祖曇首宋左光祿大夫豫寧文侯父僧虔齊司空簡穆公並有重名

謝朓字敬冲陳郡陽夏人也祖宏微宋太常卿父莊右

光祿大夫並有名前代

傅岐字景平北地靈州人祖琰齊世為山陰令有治能
自縣擢為益州刺史魏武帝時厯山陰建康令亦有能
名官至驃騎諮議

陳張稚才少孤介特立為太常卿子周還為司農廷尉
卿所厯並以清白稱

蕭弘宗族子弟多以德行知名弟彤以悟靜好學官至
太子中庶子南康王長史密字士機幼而聰敏博學有

文詞祖琛梁特進少而朗悟有縱橫才宏為吏部郎中
後魏穆壽父觀封宜都王明元時總攝朝政事無巨細
皆關決焉壽明敏有父風太武愛重之擢為下大夫

張蒲字元則河內脩武人父攀慕容垂御史中丞兵部
尚書以清方稱蒲少有父風頗涉文史以端謹見知為
相州刺史卒

盧度世寧朔將軍兼散騎常侍元之子也少以學行為
時流所重子淵昶等並循父風遠親疎屬叙為尊行長

者莫不異拜致敬閨門之禮為世所推度世為青州刺史卒

後周張元字孝始河北芮城人祖成假平陽郡守父廷雋仕州郡累為功曹主簿並以純至為鄉里所推元性謙謹有孝行不仕而卒

王褒字子淵曾祖儉齊侍中太尉南昌文尉公祖騫梁侍中金紫光祿大夫南昌安侯父規梁侍中左民尚書南昌章侯並有重名於江左褒位至宜州刺史

唐蕭德言曾祖思話齊尚書右僕射祖介梁都官尚書父
宏陳吏部侍郎並有名當代德言官終銀青光祿大夫
虞世南字伯施越州餘姚人祖簡梁始興王諮議父荔
陳太子中庶子俱有重名世南終秘書監

褚亮字休明為銀青光祿大夫宏文館學士曾祖湮梁
御史中丞祖蒙太子中書舍人父玠陳秘書監並著名
前史

韋虛心父維為左庶子伯湊河南尹皆以忠正聞虛心

舉孝廉累至侍御史中宗時推按太尉時僕射竇懷忠
侍中劉幽求意欲寬假虛心堅執法令有不可奪之志
于休烈官至工部尚書卒嗣子益次子肅相繼為翰林
學士父子儒行著聞肅子教以家世文史盛名志行二
為列曹侍郎

崔渙博陵人祖元暉父璵並先朝名臣渙少以士聞博
綜經籍尤善談論累遷尚書司門員外郎

楊綰字公權華陰人祖溫玉則天朝為戶部侍郎國子

祭酒父侃開元中醴泉令皆以儒行稱綰終於相位

穆贊河南人父寧有名節贊雅嗣其門風終於宣州觀

察使

李藩少恬淡脩簡雅容儀好學祖奢及曾祖至遠皆以
志行名重一時父承為湖南觀察使亦有名藩為相終
高霞寓范陽人祖先父栖鶴皆以孝聞凡五代同爨德
宗朝採訪使洪經綸奏旌表其門至今鄉里共稱其事
霞寓位至右金吾衛大將軍

蕭俛官至左僕射致仕家代有忠節祖父國初宋國公
瑀肅宗朝徐國公華德宗門下侍郎平章事復悉以剛
鯁不附權倖載名國史至俛之行止當澆末鬻競之俗
可謂冠被當時比肩於前代名臣

薛廷老故給事中存誠之子存誠憲宗時有重名廷老
少有令譽頗得父風文宗初為右拾遺

後唐崔協曾祖邠為太常卿祖瓘吏部尚書咸有名德
朝議稱仰協終相位

晉鄭受益唐宰相餘慶之曾孫也餘慶生澣澣生從謹
從謹兄處誨汴州節度使家襲清儉深有士風中朝禮
法以鄭氏為甲處誨生受益受益亦以文學身累厯臺
閣

兄弟齊名

天以剛健純粹之氣賦于人者幾希而昆弟競爽益為
希矣乃有善慶之冑髦英間出同氣至親馳聲並鶩或
以行義著或以才藻聞或以吏幹俱仕或以武經偕用

或孝友藹於宗黨或風規邁於儕伍詵詵之盛幾至於七八者焉詩曰原隰裒矣兄弟求矣蓋原隰相聚而能定高下之名兄弟相求亦能立榮顯之譽三代而下咸用詮次焉

周有八士伯達伯适仲突仲忽叔夜叔夏季隨季騶

周時

四乳生八子
皆為顯士

蘓秦弟蘓代蘓厲兄弟三人皆游說諸侯以顯秦終於齊相

漢李布楚人為任俠有名弟季心氣蓋關中遇人恭謹
為任俠當是時季心勇布以諾聞關中布位河東守

馮立與兄野王相代為西河上郡太守民歌之曰大馮
君小馮君兄弟繼踵相因循聰明賢知惠吏民政如魯
衛德化鈞周公康叔猶二君

鄭昌字次卿弟宏字穉卿俱明經通法律政事昌為太
原涿郡太守宏為南陽太守皆著治迹條教法度為後
所述

後漢馬嚴字威卿援之子仕郡督郵援嘗與計議委以家事嚴弟敦字孺卿亦知名援卒後嚴乃與敦俱歸安陵居鉅下三輔稱其義行號曰鉅下二卿

韋義字季卿京兆杜陵人兄順字叔文為平輿令有高名次兄豹字李明累辟公府最以事去義少與二兄齊名

賈彪字偉節兄弟三人並有高名而彪最優故天下稱曰賈氏三虎偉節最怒彪位新息長

劉才寵之弟為山陽太守有二子岱字公山繇字正禮

兄弟齊名稱

平原陶丘洪薦繇欲令舉茂才刺史曰前年舉公山今何復舉正禮洪曰若使明君

用公山於前擢正禮於后所謂御二龍於長途騁騏驎於千里不亦可乎

荀淑字季和為朗陵令有子八人儉緄靖燾注爽肅專

並有名稱時人謂八龍或問汝南許章曰爽與靖孰賢

章曰皆玉也慈明外朗叔慈內潤

慈明爽字叔慈靖字

許劭字子將潁川平輿人與兄虔並知名汝南人稱平

輿淵有二龍馬

平輿故城今潁川汝陽縣東北有二龍鄉月旦里

又劭與從兄

靖少俱知名並有人倫臧否之稱劭司空楊彪辟舉方正敦樸皆不就

陳紀及弟謨皆有盛名冠當時位大鴻臚

魏司馬朗字伯達懿字仲達孚字叔達植字季達恂字顯達進字惠達通字雅達敏字要達俱知名故時號為八達焉朗位兗州刺史

應劭弟恂字瑒瑒弟璩咸以文章顯劭位袁紹軍謀校尉

蜀諸葛喬字伯松亮兄瑾之第二子也本字仲慎與兄元遜俱有名於時論者以謂喬才不及兄而學業過之喬後拜駙馬都尉

李朝字偉南弟邵字永南又一弟早亡各有才望時人號之李氏三龍

馬良字季常襄陽宜城人兄弟五人並有才名鄉里為之諺曰馬氏五常白眉最良良眉中有白毛故以稱之良位侍中

晉繆休祖安平獻王外孫也與從兄播名譽略齊休祖位太僕卿

張載字孟陽弟協字景陽亢字季陽皆有重名亢才藻不逮二昆亦有屬綴又解音樂伎術時人謂之三張載位中書侍郎

陸機字士衡弟雲字士龍吳丞相抗之子兄弟齊名雲雖文章不及機而持論過之號曰二陸太康末與弟雲俱入雒造太常張素重其名如舊相識曰伐吳之役利

獲二俊機位平原內史

武陵字元夏沛國竹邑人沉敏有識量早獲時譽與二弟韶叔夏茂季夏並總角知名雖諸父兄弟及鄉閭宿望莫能覺其優劣同郡劉公榮有知人之鑒嘗造周周見其三子焉公榮曰皆國士也元夏最優有輔國之才陳力就列可為亞公叔夏季夏不減常伯納言也陵位開府儀同三司

束皙字廣微博學多聞與兄瑒俱知名皙位尚書郎

王導二弟頴敞少與導俱知名時人以頴方溫太真以敞比鄧伯道導位至丞相

胡奮兄弟六人兄廣弟烈並知名廣字宣祖位至散騎常侍少府

溫羨字長卿兄弟六人並知名於世號曰六龍羨位至司徒

劉宏字終嘏為光祿勳兄粹字純嘏為侍中弟潢字仲嘏為吏部尚書並有名中朝時人語曰維中雅雅有三

嘏

桓嗣字恭祖征西大將軍豁弟冲之子少有清譽與豁子石秀並為桓氏子姪之冠嗣位江夏相

顏含三子髦為侍中光祿勳謙至安成太守約零陵太守並有聲譽

荀闓荀邃大寧中過江明帝嘗從容問王廙曰二荀兄弟孰賢廙荅以闓才明過邃帝以語庾亮曰邃真粹之地亦闓所不及繇是議者莫能定其兄弟優劣

卞粹字元仁以清辨鑒察稱兄弟六人並登宰相府世稱卞氏六龍元仁無雙

解系及二弟結育並清身潔已甚得聲譽系至雍州刺史

王珣小字法護弟珉小字僧彌少有才藝善行書名出珣右時人為之語曰法護非不佳僧彌難為兄珣位散騎常侍

孔安國廣州刺史注之弟年少諸兄三十餘歲群從諸

兄並乏才名以富彊自立唯安國與注少厲孤貧之操
注既以直亮稱安國亦以儒素顯安國位至左僕射

宋王球字倩王瑯琊臨沂人太常惠從父弟與惠齊名
球位尚書僕射

張暢字少微吳郡人少與從兄敷齊名為後進之秀暢
位會稽太守

張岱吳郡人少與兄太子中書舍人演新安太守鏡征
北將軍永弟廣州刺史辨俱知名謂之張氏五龍演鏡

名最高永辨岱不及也

劉善明為青冀二州刺史弟僧副與善明俱知名於州里

戴法興二兄延壽延興並脩立延壽善書法興好學山陰有陳戴者家富有錢三十萬鄉人咸云戴碩子二兒敵陳戴三十萬錢法興位越騎校尉

南齊沈沖與兄淡淵名譽有優劣世號為腰鼓兄弟沖位五兵尚書

陸惠曉三子僚任僉並有美名時人謂之三陸初授惠
曉兖州三子依次第各作一讓辭並雅麗時人歎服
梁張稷性疎率朗悟有子路風與族兄充融卷等俱知
名時稱之曰充融卷稷是為四張稷位鎮北將軍

樂法才字元簡幼與弟藏俱有美名法才位江夏太守
到溉少孤貧與弟洽俱聰敏有才學早為任昉所知繇
是聲名益廣溉位散騎常侍事

韋叡與兄纂閔並早知名叡位護軍

王筠字元禮清淨好學與從兄泰齊名陳郡謝覽覽弟
舉亦有重譽時人為之語曰謝有覽舉王有養炬炬是
泰養即筠並小字也位太子詹事

謝舉字言揚中書令覽之弟也幼好學能清言與覽齊
名覽嘗侍宴華林園高祖問舉於覽覽對曰識藝過臣
甚遠唯飲酒不及於臣高祖大悅江淹一見並相欽挹
曰所謂馭二龍於長途者也舉位尚書令

劉孝綽之弟孝勝與兄孝儀弟孝威孝先並善五言詩

見重於世

孝綽嘗云三筆六詩三即孝儀六謂孝威也

孝綽又與從弟孺苞

齊名

苞早卒孺亦貴顯

孝綽位秘書監

蕭子範少與弟子顯子雲才名略相比而風彩容止不逮故宦途有優劣每讀漢書杜綬兄弟五人至大官唯中弟欽官不至而最知名嘗吟諷之況已也子範位光祿大夫

江革為征北記室叅軍弟觀為行叅軍兼記室時吳興沈約樂安任昉並相賞重昉與革書云此段雍府妙選

英才文房之職總卿昆季可謂馭二龍於長途騁騏驎
於千里

柳惔世隆之子少與長兄悅齊名王儉謂人曰柳氏二
龍可謂一日千里儉為尚書左僕射嘗造世隆宅世隆
謂為詣已徘徊久之及至門唯求悅及見惔遣謂世隆
曰賢子俱有盛才一日見顧今故報禮若仍相造似非
本意恐年少窺人惔位祕書監

裴子野字幾原河東聞喜人兄黎弟楷綽並有盛名所

謂四裴也子野位鴻臚卿

徐嗣徽及弟宗並有武用

王銓雖學業不及弟錫而孝行齊焉時人以為銓錫二王可謂玉昆金友錫位至吏部郎中

顧協二子之儀之推並早知名之推承聖中仕中書舍人

薛暉為領軍將軍有六子子建子尚知名

岑善方為起部尚書有七子並有操行之元之利之象

最知名

陳陸瑜字幹玉少篤學美詞藻為東宮學士兄琰時為
管記並以才學娛侍左右時人比之二應

杜薊兄弟五人兄嵩岑疑巖岸及弟幼安並知名當世
薊位江州刺史

後魏高湖字大淵渤海蓊人少機敏有器度與兄韜俱
知名於時雅為鄉人崔暹所敬異湖位至寧西將軍

尉地干為侍輦即奉上忠謹弟侯頭襲地干職為庫部

尚書侯頭弟力斤亦以忠謹聞歷位御史中尉

李順興從兄靈從弟孝伯並以學識器業見重於時故能砥礪宗族競各脩尚順位安西將軍

陸偉字道暉與弟恭之並有時譽雒陽令賈禎見其兄弟嘆曰僕以年老更覩雙璧又兄弟共候黃門郎孫惠蔚謂諸賓曰不意二陸復在坐隅吾德謝張公無以延譽

劉休賓字處幹北海人少好學有文才兄弟六人秉民

延和等皆有時譽休賔位懷寧令

陽鳴鵠與弟季智俱有名於時前後並為幽州司馬崔
勵為中書侍郎與從兄鴻俱知名於世

崔亮字敬儒為散騎常侍有三子士安士和士泰並以
彊幹善於當世士安位諫議大夫

尹循為太原太守弟家遠西太守兄弟皆有政事才

楊大眼有三子長甌生次領軍次征南皆潘氏所生氣
幹咸有父風大眼位荊州刺史

高崇為雒陽令子謙之為河陰令損益治體名為故事
謙之弟道穆為御史亦有能名

北齊李瑾六子彥之情之壽之禮之行之凝之並有氣
望行之與兄弟深相友愛又風素夷簡為士友所稱范
陽盧思道是其舅子嘗贈詩云水衡稱逸人潘楊有世
親形骸預冠蓋心思出風塵時人以為實錄瑾位至光
祿大夫

司馬子結兄弟三人皆涉文學陽休之收西兗子廉子

尚子結與諸朝士各有詩言贈陽揔為一篇酬答即詩云三馬俱白看者子結為南陽王官記

王昕兄弟九人並風流蘊藉世號王氏九龍位銀青光祿大夫

盧叔武與兩兄觀仲並以文章顯於雒下叔武為散騎常侍

常道遜與兄道密道建道儒並以文章知名位右光祿大夫

宋世良與弟世軌俱有孝友之譽

後周裴寬儀貌瓌偉博涉群書弱冠為州里所稱與二弟漢尼並知名寬位涉州刺史

寇雋字祖雋上谷昌平人性寬雅幼有識量好學強記兄祖訓祖禮及雋並有志行雋位驃騎將軍

蘓亮少與從弟綽俱知名然綽文章稍不逮亮至於經書進趣亮又減之故世稱二蘓亮弟湛字景雋少有志行與亮俱著名西土亮位衛將軍南汾州刺史

隋杜正元字慎徽鄴人聰敏博涉多通第正臧字為善
好學善屬文兄弟數人俱未弱冠並以文章才辯籍甚
三河之間大業中應詔舉秀才兄弟三人一時詣闕論
者榮之正元位豫章王記室

尹正卿弟彥卿河間人俱有雋才名德顯於世

賀德仁越州人少與兄德基俱事國子祭酒周宏正咸
以詞學見稱時人語曰學行可師賀德基文質彬彬賀
德仁兄弟八人時人方之荀氏德仁弟子紀數亦以博

學知名德仁為趙王友

盧昌衡字子均小字龍子風神澹雅容止可法博涉經史工行草書從弟思道小字釋奴宗中俱稱英妙故幽州為之語曰盧家千里釋奴龍子昌衡位太子左庶子唐虞世南初仕陳為西陽王友陳滅與兄世基同入長安俱有重名時人方之二陸

即餘今祖楚之少與兄蔚之俱重名隋大業中蔚之為左丞楚之為尚書民曹郎煬帝重其兄弟稱為二郎

溫彥博兄弟三人父友薛道衡李綱見之曰皆卿相才也彥博位至中書侍郎

薛萬徹父世雄大業末卒於涿郡太守萬徹少與兄萬均隨父幽州俱以武略為羅藝所親待位寧州刺史杜正倫相州洹水人隋仁壽中與兄正元正藏俱以秀才擢第才總十人正倫一家有三秀才甚為當時稱美仕至中書令

張昌宗冀州南宮人少與兄昌齡俱以文詞知名昌宗

位至春官侍郎

溫大雅性至孝少好學以才辯知名季弟大有字彥將
聰明好古幼有令譽才學亞於二昆而篤行過之大雅
位右僕射

唐臨與兄皎俱有令名皎歷位吏部侍郎臨亦以文史
著稱為吏部尚書

王勃與兄勔俱稱少俊父友考功員外郎杜易簡嘗
稱曰此王氏三珠樹也勃位虢州參軍

賈敦實為雒州長史初敦實兄敦頤為雒州刺史甚有惠政百姓共樹碑于大市通衢及敦實去職復刻石頌其德政立於兄碑之側故時人呼為棠棣碑焉

韋斌郇國公安石之子早脩整遊心文藝與兄陟齊名斌位至臨安太守

楊慎矜父崇禮太府卿二十餘年時議稱職及崇禮罷太府元宗訪堪委其父任者宰臣稱慎矜慎餘慎名三人皆勤恪清白有父風時慎矜汝陽令有能名因召拜

監察御史知太府出納慎餘授太子舍人監倉尋丁父憂服闋累遷侍御史仍知太府出納慎名授大理評事攝監察御史充含嘉倉出納使其甚承恩顧慎矜在臺數年風格甚高遷擢判御史中丞充京畿採訪使太府出納如故

盧奕黃門監懷慎之少子也與其兄奐齊名謹愿寡慾不尚輿馬克已自勵開元中任京兆司錄參軍天寶初為鄆縣令兵部郎中所歷有聲皆如奐之所歷

王之咸為長安縣尉與昆弟之漬之渙皆善屬文

王維與弟縉皆才秀以詞學齊名維位尚書右丞

張知鸞家于岐與兄知立知晦弟知泰知默勵志讀書
皆明經擢第位大理卿致仕

辛雲京河西之大族代掌戎族兄弟數人並以將帥知
名雲京仕至河東節度使

蔣沅為監察御史與兄演溶弟清俱以幹局吏事擅能
名於天寶中長吏韓明宗裴迥咸以推覆簡勾之任委

之處事平允割斷精當動為群僚楷式

路敬淳與弟敬潛俱早知名敬淳位太子司議郎

陸象先為太子少保弟景倩為監察御史景融歷左右

丞工部尚書景獻屯田員外郎景喬庫部郎中皆有美

譽僧一行少時嘗與象先昆弟相善嘗謂人曰陸氏兄

弟皆有才行古之荀陳無以加也其為當時所稱如此

孫成幼涉學兄宿絳早知名位至桂州刺史

柳渾初名載少孤志學工為文章與兄識齊名位至兵

部侍郎平章事

吳通元與兄通微俱博學善屬文詞彩綺麗通元幼應神童舉建中初策賢良方正等科通元應文詞清麗登乙第皆以文章知名同為翰林學士

蘓弁與兄冕皆以友悌儒學稱弁位杭州刺史

楊憑字虛受宏農人工文詞少負氣節與母弟凝凌相友愛皆有時名位京兆尹

韋綬為翰林學士其弟纁有精識奧學為士林所器故

其兄弟令稱推於一時

柳登字成伯右司郎中集賢學士芳之子少嗜學其弟福建觀察使晃咸以該博著稱位右散騎常侍致仕

崔郾與兄邠等皆有令譽而郾疎財恢廓弟兄所不及位為浙西觀察使

馮定與兄宿皆有文學而定過之貞元中皆舉進士時人比以漢朝二馮君定位至工部尚書致仕

李景儉弟景儒景信景仁皆有藝學知名於時景信景

仁皆登進士第

穆寧子贊質員賞質兄弟俱有令譽而和粹世以滋味目之贊俗而有裕為酪質美而多文為酥員為醍醐賞為乳腐近世士大夫言家法者以穆氏為高寧位祕書監致仕

崔瑄弟珙琮璵璠璣兄弟八人皆至達官時人以比漢之荀氏號曰八龍

後唐李琪十三為賦頌舉進士擢第琪兄珽亦登進士

第才藻富贍兄弟齊名琪位太子少傅致仕

劉昫字輝遠涿州歸義人也兄昶弟皞俱有鄉曲之譽
昫位平章事

趙光裔光逢之弟俱以詞藝知名登進士第光裔仕梁
歷清顯官伯仲之間咸以方雅自高北人聞其名者皆
望風欽重光裔位至平章事

任圜京兆三原人祖清成都省父茂宏避地太原奏授
西河令有子五人曰圖回圜團圀風彩俱異圜位平章

事

周竇禹鈞有子五人儀儼侃偁僖皆擢進士第禹鈞任
澶州廉判時馮道贈詩云澶察竇中郎於家有義方靈
椿一樹老仙桂五枝芳

冊府元龜卷七百八十三